



CH-7144 Vella, 05/02/2016

## **Novitads dalla suprastonza communal**

### **Dumbraders d'aua**

Cun igl 1. da schaner 2016 ein las leschas communalas davart il provediment d'aua e la dismessa dall'aua piarsa idas en vigur. Ils dumbraders d'aua ein vegni montai e mess en funcziun. Proximamein vegnan ils dumbraders existents a Suraua, Vignogn, Nussaus e Surin remplazzai entras dumbraders cun modul da func. Pil mument vegn la funcziunalitad dils sclusadurs controllada.

### **Sanaziun vias da meglieraziun Vignogn**

Igl onn 2011 haveva la radunonza communal da Vignogn decidu da sanar las vias da meglieraziun a Vignogn en treis etappas. Proximamein duei la secunda etappa che cumpeggia las vias da Bars – Patiarm vegnir realisada. Igl uffeci d'agricultura dil cantun Grischun ha approbau il project dalla secunda etappa per il program da lavur 2016.

### **Spazzar claus da nuorsas a Camuns**

La vischnaunca ei proprietaria dil claus da nuorsas a Camuns e preveda da spazzar quel. Per far quellas lavurs vegn menau atras ina procedura per lubientschas da baghegiar.

### **Lavur da giuventetgna**

Sin incarica dalla suprastonza communal ha il post specialisau per lavur da giuventetgna (Fachstelle jugend.ch) elavurau in rapport davart il stan actual ella vischnaunca Lumnezia. Il rapport fa attent sin munconzas e cuntegn propostas d'agir. Ina gruppa da lavur permanenta sefatschenta cun la planisaziun dalla lavur futura da giuvenils en Lumnezia.

### **Plazza d'emprendissadi ell'administraziun communal Lumnezia**

Entochen ussa porscha la vischnaunca Lumnezia mintga 3 onns la pusseivladad d'absolver in emprendissadi mercantil ell'administraziun communal. Pil futur ha la suprastonza communal decidu d'engaschar mintga dus onns in emprendist. La proxima piazza d'emprendissadi vegn publicada la primavera 2016.

## **Elecciuns**

### **a) Representanza SanaSurselva (Spital regional)**

Cun la midada dalla fuorma giuridica dil Spital Regional Surselva ei la delegada d'entochen ussa, Elisabeth Lorez, vegnida elegida ella suprastonza da SanaSurselva. Per remplazzar la representanza communal ha la suprastonza communal elegiu Ronnie Caminada sco niev delegau e Gioni Capaul sco suppleant.

### **b) AssessurA Biblioteca Lumnezia**

La suprastonza communal ha elegiu Hilda Livers-Capeder sco assessura dalla cumissiun da biblioteca. Ella remplazza Roman Weishaupt e stat a disposiziun per in temps transitoric entochen ils 31-12-2016.

### **Consultaziun Charta Parc Adula**

La consultaziun Charta Parc Adula ha giu liug dils 9 da november 2015 entochen igl 1. da fevrer 2016. En vesta alla situaziun speciala, che la decisiun ei resalvada al vischinadi da Vrin ha la suprastanza communal organisa in inscunter da discussiun intern a Vrin per sentir ils giavischs e las pretensiuns da quels ch'ei pertuccai directamein. La discussiun survescha alla suprastanza communal sco basa per prender posiziun enviers ils acts da consultaziun. La posiziun sesanfla sin la pagina d'internet dalla vischnaunca Lumnezia.

### **Consultaziun ordinaziun federala davart protecziun da biotops e cuntradas da palius**

La consultaziun davart la protecziun da biotops e cuntradas da palius da valeta naziunala cuora entochen ils 31 da schaner 2016. La revisiun preveda engrondiments massivs dallas surfatschas da biotops e considerabels augments d'objects da muntada naziunala surtut en territoris turistics e per liung da flums. Quei restrenschesch era la vischnaunca Lumnezia en la libertad d'agir sil camp turistic sco era tier la pusseivladad d'exploitar forza hidraulica ed ei perquei d'impedir. En quei senn ei vegniu priu posiziun enviers la revisiun proponida.

### **Anniversari da 100 onns**

A Tersnaus ha Anna Maria Ursula Sgier-Derungs festivau siu 100avel anniversari. Representants dalla vischnaunca han fatg viseta e surdau in present alla giubilara.

### **Vischnaunca da padrinadi Herrliberg**

La suprastanza communal da Herrliberg ha fatg viseta a nossa vischnaunca. Herrliberg ha susteniu finanzialmein las anteriuras vischnauncas da Degen e Vignogn entochen la fusiun e silsuenter projects turistics sco il baghetg da menaschi a Davos Munts ni cuosts per l'infrastructura dalla loipa a Degen.

### **Sustegn finanziel per instituziuns**

La suprastanza communal ha dau suatientscha alla damonda dall'instituziun Wanderbühne Dr. Eisenbarth per sustegn finanziel en favur dil project da teater Pfunggeli, che vegn presentaus el decuors dil matg/zercladur 2016 en Lumnezia.